



Inatsisartunut ilaasortaq
Storm Ludvigsen, IA
-/Maani.

Akissut nr. 2009-167, § 36 naapertorlugu imermik tunisassiorneq pillugu apeqquteqaammut.

Asasara Storm Ludvigsen.

Inatsisartut suleriaasianni § 36, imm. 1 naapertorlugu apeqquteqarsimavutit:

Imermik tunisassiorneq pillugu Naalakkersuisut qanoq pilersaaruteqarpat?

Apeqqutigisannut tunngavilersuutigaat nunarsuarmi imeq mingutsinneqarsimanngitsoq annertuumik piumaneqartoq, aammalu nunatsinni nioqqutissiorfiit amerlasuut matunikuusut.

Naalakkersuisut sinnerlugit qujassutigissavakka sermimik imermillu nioqqutissiorneq avammullu tuniniaaneq pillugit apeqqutigisatit, tassungalu atatillugu inuussutissarsiornikkut periarfissat. Naalakkersuisut sermimik imermillu avammut niueruteqarsinnaaneq inuussutissarsiornikkut annertusiartortumik periarfissatut isigaat, aammalu nioqqutissiorfinnik aallartitsiortornissamut periarfissaris-saarfiusutut.

Sermimik imermillu avammut nioqqutissiorsinnaanermut anguniagassanut pilersaarussiaq 2004-mi suliarineqarpoq, 2013-ip tungaanut pilersaarutaasoq. Anguniakkat siunertaraat sermimik imermillu avammut niueruteqarnermi tunngavissanik patajaatsunik pilersitsinissaq, taamaaliornikkut inuussutissarsiummik namminersorluni ingerlanneqartumik arlaqartunillu nioqqutissiorartoqarfiusumik pilersit-sisoqarsinnaaqullugu. Naalakkersuisut killiliussassat tunngaviusussat pilersis-simavaat, taamaaliornikkullu namminersortut sermimik imermillu nioqqutissior-nissamik kissaatigisaqartut killiliussanik tunngavissinneqarput, aningaasaliinis-samut, nioqqutissior-nissamut avammullu tuniniaanermik aallartitsisoqarsinnaan-ngorlugu. Sermimik imermillu nioqqutissior-nertaa avammut niueruteqarnerup ineriartortinneqarnissaani suliassap ilagiinnarpaa annertunngitsoq. Niuerfissanik nalilersuineq, ussasaaruteqartarneq aamma akigitinneqartussanik aalajanger-saarneq, avammut tuniniaaneq ingerlatallu avatangiiserisaat aningaasarsior-nikkullu ingerlatsineq, kiisalu nioqqutissiorneq nioqqutissianillu assartuiner-mik aaqqissuussinerit tassaapput nioqqutissiornermik aallartitsiniarnermi unammil-ligassat.

11. januar 2010
Sagsnr. 2010-024301

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@gh.gl
www.nanoq.gl

Sermimik imermillu avammut niuruteqarnermik ineriartortitsinerup siunertarisaa tassaavoq ineriartortitsinissamut periarfissanik inerititaqarfiusinnaasunik aallusineq, kisiannili taamatut suliaqarnermi siunertaasimanngilaq Namminersorlutik Oqartussat nammineq suliffeqarfimmik aallartitsinissaat. Suliassaq taanna suliffeqarfinnut namminersortunut aningaasalersuerusuttunullu aallunneqartussatut isumagisassaatinneqartussaavoq. Piffissami matumani suliffeqarfiit marluk sermimik avammut niuruteqarsinnaanermut akuersissummik pigisaqarput, suliffeqarfik ataaseq imermik minguitsumik avammut niuruteqarsinnaanermut akuersissuteqarfigineqarluni, kiisalu suliffeqarfiit marluk aallarnisarlutik sermimit aassimasumit avammut tuniniaanissamut piareersaateqartut.

Anguniakkap ilaatut nalunaarusiortoqarsimavoq, qarasaasiami sermimit imermillu nioqqutissiornissamut periarfissanik nalunaarsuiffiliortoqarluni aammalu niurfissani misissuinermik ingerlatsisoqarsimalluni, piviusorsiortumik niurfiusinnaasuni akigitinneqarsinnaasut qulaajarneqarsimallutik, imermik sermersuarmiit aatsillugu puujasaaqqanut poortorlugu niuruteqarsinnaaneq eqqarsaatigalugu. Kiisalu allattoqarfimmik pilersitsisoqarsimavoq, ilisimasani misilittakkanillu katersiffiusussamik, aningaasaleerusuttut saaffiginnissutaannik isumaginniffiusussamik. 2009-mi sermimik nioqqutissiornissamut periarfissat pillugit allattuiffiliortoqarpoq, taannalu qanittukkut qarasaasiami quppernermi www.iceandwater.gl nassaarineqarsinnaalissaaq, qupperneq taanna sermimik imermillu minguitsumik avammut tunisassiorneq pillugu pisortatigoortumik quppernerummat.

Anguniakkatut siunnerfiusut tunngavigalugit suliniutissaq tulliuutoq tassaavoq kalaallit sermimit imermillu nioqqutissiaasa ussassaarutigineqarnissaannut siunnerfiliornissaq, kiisalu aningaasaliisinnaasunut nioqqutissiorsinnaanermut anertusisamik soqutiginnilernissamut ussassaarinissaq.

Inussiarnersumik inuulluaqqusilluta

Ove Karl Berthelsen
Naalackersuisoq